



CONVENIO DE COLABORACIÓN ENTRE A AXENCIA GALEGA DE INFRAESTRUTURAS E O CONCELLO DE PADRÓN PARA O ACONDICIONAMENTO DA ANTIGA AC-299

Santiago de Compostela, 22 de setembro de 2020

REUNIDOS

Dunha parte, Ethel M^a Vázquez Mourelle, presidenta da Axencia Galega de Infraestruturas, facultada para a formalización deste convenio polo Decreto 173/2011, do 4 de agosto, polo que se aproba o estatuto da Axencia Galega de Infraestruturas.

Doutra parte, Antonio Fernández Angueira na súa condición de alcalde do Concello de Padrón, actuando en virtude das facultades representativas que lle atribúe o artigo 21.1 b) da Lei 7/1985, do 2 de abril, reguladora das bases do réxime local.

Todas as partes recoñécense mutuamente na calidade en que interveñen con capacidade legal suficiente e necesaria para o outorgamento do presente convenio de colaboración e, a tal efecto

EXPOÑEN

Primeiro. A Axencia Galega de Infraestruturas ten entre os seus obxectivos a mellora da rede viaria de Galicia, de xeito que se proporcione ás persoas usuarias da rede unhas condicións de condución cómodas e seguras, mellorando os déficits na seguridade viaria e facilitando o acceso aos distintos equipamentos na procura e no fomento dun desenvolvemento harmónico.

Segundo. O Plan de Mobilidade e Ordenación Viaria estratéxica, plan MOVE, contempla entre as súas liñas básicas garantir a mellora das condicións de accesibilidade e da mobilidade das persoas.

Terceiro. O Plan de Seguridade Viaria de Galicia 2016-2020 ten como obxectivo estratéxico 2 a consecución de vías de tránsito e mobilidade máis seguras.

Cuarto. A principios de 2013 iniciouse a tramitación do cambio de titularidade da estrada ao seu paso polo Concello de Padrón (PK 0 ao 2+160). O Consello da



Xunta aprobou mediante o Decreto 36/2013, do 14 de febreiro, o cambio de titularidade; sen embargo, a acta de entrega non foi asinada polo Concello, que solicitou como requisito previo que a consellería rehabilitase o firme da estrada.

En febreiro de 2015 o concello remitiu unha memoria valorada das obras solicitadas de rehabilitación de firme, que terían un custe de 241.416,66 €. Para o seu financiamento, iniciouse a tramitación dun convenio de Capítulo VII polo que o concello se comprometería a asinar a acta de entrega da estrada de xeito simultáneo á sinatura do convenio, e a Xunta financiaría o acondicionamento da estrada entre o PK 0 e 2+130, ata un máximo de 241.416,66 €. O citado convenio foi rexeitado polo Concello.

Quinto. Coa sinatura deste convenio, o concello resolve os problemas de funcionalidade e seguridade viaria da antiga AC-299, con beiravías e beirarrúas moi reducidas, e edificacións moi próximas á calzada. O estado do firme e da sinalización horizontal non é axeitado, e a día de hoxe pode chegar a supoñer un risco para a seguridade viaria.

De feito, e de acordo cos partes de accidentes sucedidos nesta vía, entre 2013 e 2016, ambos inclusive, non se producira ningún accidente con vítimas na estrada. Sen embargo, tan só no ano 2017 produciron dous accidentes con resultado de un ferido grave cada un, un deles por atropelo e outro por saída de vía, o cal é un dato moi preocupante ao tratarse dun viario de pouco máis de dous quilómetros de lonxitude.

Con tal motivo o concello presenta o documento técnico denominado “Actuacións na AC-299 Padrón (AC-307) – Padrón (AC-301) no concello de Padrón” que ten por finalidade repoñer unhas condicións axeitadas de firme e de sinalización para mellorar a seguridade viaria. Achégase así mesmo programa de traballo que se distribúe ao longo dos anos 2020 e 2021.

Sexto. A Axencia Galega de Infraestruturas, en colaboración co Concello de Padrón, trata de fomentar aqueles investimentos que resolvan problemas nas infraestruturas, coa finalidade dun desenvolvemento económico e social que aporte unha maior calidade de vida á cidadanía. As actuacións obxecto deste convenio son complementarias á propia idea básica e intrínseca da estrutura elemental da calzada e da infraestrutura viaria. Esa consideración de complementariedade, xunto coa necesidade dunha actuación en materia de accesibilidade e seguridade viaria, xustifican a concesión directa dunha subvención ao Concello de Padrón ao abeiro do disposto no artigo 19.4 c) da Lei 9/2007, do 13 de xuño, de subvencións de Galicia, por parte da Axencia Galega de Infraestruturas.

Os convenios entre administracións públicas constitúen o elemento adecuado



para desenvolver a súa cooperación en cuestións de interese común, tal e como establecen o artigo 57 da Lei 7/1985, do 2 de abril, reguladora das bases de réxime local e o artigo 198 da Lei 5/1997, do 22 de xullo, de administración local de Galicia.

Considerando a confluencia dos intereses das partes comparecentes, faise preciso artellar as bases para a óptima coordinación e así regular a colaboración nas súas actuacións. Para o fin mencionado, formalízase o presente convenio con suxeición ás seguintes

CLÁUSULAS

PRIMEIRA. OBXECTO

O obxecto do presente convenio é establecer as bases da colaboración técnica e económica entre a Xunta de Galicia e o Concello de Padrón para mellorar a seguridade viaria e a funcionalidade da antiga AC-299 executando as obras recollidas no documento técnico "Actuacións na AC-299 Padrón (AC-307) – Padrón (AC-301) no Concello de Padrón".

As intervencións propostas consisten en repoñer un estado axeitado o firme e a sinalización deste viario, con tratamentos diferentes en función do treito de que se trata de modo que os vehículos poidan percibir as condicións no viario no que están circulando e se adecúe a condución ás características da vía. Deste modo, diminuírase o risco para os usuarios da estrada, aumentando como se pode comprobar na ocorrencia dos accidentes con vítimas graves no ano 2017 cando nos catro anos anteriores non sucedera ningún accidente con vítimas.

Así, no treito inicial de 300 m de lonxitude, con edificacións moi próximas á calzada, é necesario reducir a velocidade e limitar o paso a vehículos pesados, de modo que se garanta a seguridade viaria para vehículos e peóns. Prevese conformar unha única plataforma, con velocidade limitada a 30 km/h, e pavimento de formigón desactivado, o cal producirá aos condutores un efecto de percepción de entrada nunha zona máis urbanizada. Para poder executar a actuación neste treito repoñeranse e ordenaranse os servizos urbanos, demolerase o firme existente e executarase o novo firme de formigón desactivado sobre base de zavorra.

No resto da estrada, entre os PK 0+300 e 2+160, rehabilitarase o firme con saneos onde sexa necesario e unha capa de rodadura de mestura bituminosa de



5 cm, repoñéndose despois a sinalización horizontal e colocándose captafaros e un treito de barreira de seguridade.

O orzamento de execución das actuacións estímase en CATROCENTOS SETENTA E OITO MIL SEISCENTOS NOVENTA E SEIS EUROS CON TRECE CÉNTIMOS DE EURO **(478.696,13 €)**, IVE incluído.

SEGUNDA.- REQUISITOS

De acordo co establecido no artigo 4 do Decreto 193/2011, do 6 de outubro, polo que se regulan especialidades nas subvencións ás entidades locais galegas, será requisito para a concesión desta subvención directa que o Concello de Padrón cumprise co deber de remisión ao Consello de Contas da súa conta xeral.

TERCEIRA. - OBRIGAS DO CONCELLO

O Concello de Padrón obrígase a:

1. Levar a cabo as actuacións necesarias para a correcta execución das obras obxecto deste convenio (redacción de documento técnico necesario para a execución das obras, licitación e execución das mesmas).
2. Asumir as obrigas económicas que excedan do importe consignado na cláusula cuarta.
3. Cumprir os requisitos para obter a condición de beneficiario establecidos no artigo 10 da Lei 9/2007, do 13 de xuño, de subvencións de Galicia. Consonte o establecido no artigo 27.5 da Lei 9/2007, de 13 de xuño, de subvencións de Galicia, o concello asume, na súa condición de beneficiario, a total responsabilidade ante a Axencia Galega de Infraestruturas. Tamén se compromete a establecerlle ao contratista a obriga de colaboración para o exercicio das funcións de control previstas no artigo 45 da citada lei.
4. Facilitar, se fose o caso, toda a información que lle sexa requirida pola Intervención Xeral da Comunidade Autónoma, polo Tribunal de Contas e polo Consello de Contas de Galicia no exercicio das súas funcións de fiscalización e control do destino das axudas obxecto do presente acordo.
5. Comunicar á Axencia Galega de Infraestruturas, se fose o caso, a alteración nas condicións tidas en conta para a concesión da axuda obxecto deste convenio e, en todo caso, a obtención concorrente de subvencións ou axudas outorgadas

por outras administracións, entes públicos ou privados, nacionais ou internacionais para os efectos de propoñer, se procedera, a modificación das condicións establecidas neste convenio.

6. Comunicar á Axencia Galega de Infraestruturas a data de recepción das obras para os efectos de que esta envíe un representante se así o estima oportuno.

7. O concello deberá dar publicidade das obras mediante un cartel anunciador no que conste expresamente o financiamento da Xunta de Galicia (Consellería de Infraestruturas e Mobilidade–Axencia Galega de Infraestruturas) de acordo coa imaxe corporativa oficial da Xunta de Galicia.

O anterior cartel de obras complementarase con outro situado ao seu carón coa única mensaxe “Xunta de Galicia”, co seguinte deseño:



En todo caso este último cartel terá a mesma altura que o cartel de obra convencional, e manterá a proporción desta imaxe na dimensión horizontal.

CUARTA.- COMPROMISOS DA XUNTA DE GALICIA.

A Xunta de Galicia, a través da Axencia Galega de Infraestruturas, asume o compromiso de financiar a actuación, destinando para iso ata un máximo de **CATROCENTOS SETENTA E OITO MIL SEISCENTOS NOVENTA E SEIS EUROS CON TRECE CÉNTIMOS DE EURO (478.696,13 €)**, con cargo a partida orzamentaria 08.A1.512B.760.0, código de proxecto 1999-06714, dos orzamentos da Axencia Galega de Infraestruturas coa seguinte distribución de anualidades:

ANO	Importe (€)
2020	47.869,61 €
2021	430.826,52 €
TOTAL	478.696,13€

QUINTA.- XUSTIFICACIÓN E PAGAMENTO.

A xustificación dos gastos e o seu pagamento realizarase nos termos establecidos na Lei 9/2007, do 13 de xuño, de subvencións de Galicia, no Decreto 11/2009, do 8 de xaneiro, polo que se aproba o Regulamento da citada Lei, e no Decreto 193/2011, do 6 de outubro, polo que se regulan as especialidades nas subvencións ás entidades locais galegas.

Segundo o establecido no artigo 62 do Decreto 11/2009, do 8 de xaneiro, polo que se aproba o Regulamento da Lei 9/2007, do 13 de xuño, de subvencións de Galicia, poderán realizarse pagamentos a conta, que responderán ao ritmo de execución da acción subvencionada. Estes pagamentos aboaranse por contía equivalente á xustificación presentada, ata un máximo do 80%.

O Concello de Padrón xustificará a subvención mediante a presentación da seguinte documentación:

- 1.- Certificación da intervención ou do órgano que ten atribuídas as facultades de control da toma de razón en contabilidade do gasto realizado e do cumprimento da finalidade para a que foi concedida.
- 2.- Certificación expedida pola secretaría da entidade local, co visto e praxe do alcalde, relativa á aprobación polo órgano competente da conta xustificativa da subvención na que se faga constar, como mínimo, de forma detallada:
 - O cumprimento da finalidade da subvención.
 - Os gastos totais imputables á actuación subvencionada, coa identificación do acredor/a, número de factura, data de emisión e data de recoñecemento da obriga polo órgano competente.
 - Os documentos acreditativos dos gastos realizados con recursos propios.
 - Unha relación detallada doutros ingresos ou subvencións que financiasen a actividade subvencionada, coa indicación do importe e a súa procedencia, de ser o caso.
- 3.- Acreditación do cumprimento das obrigas tributarias, coa Seguridade Social, e de non ter pendente de pagamento débedas coa administración pública da comunidade autónoma de conformidade co establecido nos artigos 10 e 11 do Decreto 11/2009, do 8 de xaneiro, polo que se aproba o Regulamento da Lei 9/2007, do 13 de xuño, de subvencións de Galicia.

4.- Declaración responsable da obtención doutras subvencións, axudas, ingresos ou recursos que financien as actuacións subvencionadas.

5.- Mostra fotográfica dos carteis da publicidade da subvención, segundo o establecido na cláusula terceira do convenio.

6.- Serán subvencionables os gastos de execución das obras realizados durante o ano 2020. En ningún caso serán subvencionables o custo da reposición dos servizos afectados que non estean contemplados no orzamento base de licitación do proxecto nin o da obtención de autorizacións e dos terreos privados afectados pola execución das obras.

A data límite para a xustificación destes gastos é o 15 de decembro para a anualidade 2020 e o 30 de novembro para a anualidade 2021.

7.- O pagamento realizarase pola parte proporcional da contía da axuda efectivamente xustificada, calculada en función da porcentaxe subvencionada sobre o custo total da actividade.

De conformidade co establecido no artigo 3.1 do Decreto 193/2011, do 6 de outubro, polo que se regulan especialidades nas subvencións as entidades locais galegas, unha vez que se efectúen os libramentos por parte da Axencia Galega de Infraestruturas a favor do Concello de Padrón, este deberá acreditar documentalmente a efectividade dos pagamentos realizados no prazo máximo de sesenta días naturais contados a partir do ingreso na conta bancaria da beneficiaria de cada un dos aboamentos da subvención concedida.

SEXTA.- SEGUIMIENTO E CONTROL

Para o seguimento, control e avaliación de cantas dúbidas poidan xurdir na aplicación do convenio constituirase unha comisión de seguimento, coa participación dun representante da Axencia Galega de Infraestruturas e dun representante do Concello de Padrón.

A comisión poderase reunir as veces que se estime oportunas para o cumprimento do convenio. En todo caso, a solución das incidencias que poidan xurdir estará condicionada polas limitacións orzamentarias incluídas na cláusula cuarta.

As cuestións litixiosas xurdidas da interpretación, desenvolvemento e aplicación



do convenio serán resoltas pola Axencia Galega de Infraestruturas, poñendo aos seus acordos fin á vía administrativa. Contra estes acordos poderase interpoñer recurso contencioso- administrativo ante o Tribunal Superior de Xustiza de Galicia, de conformidade co disposto na Lei 29/1998, do 13 de xullo, reguladora da xurisdición contencioso- administrativa.

SÉTIMA. - NATUREZA DO CONVENIO

Este convenio ten natureza administrativa e regularase polo establecido no presente convenio, nos artigos 47 e seguintes da Lei 40/2015, do 1 de outubro de réxime xurídico do sector público e, supletoriamente, polos principios da Lei 9/2017, do 8 de novembro, de contratos do sector público, pola que se traspón ao ordenamento xurídico español as Directivas do Parlamento Europeo e do Consello 2014/23/UE y 2014/24/UE, do 26 de febreiro de 2014.

O desenvolvemento dos compromisos, obrigas e demais actuacións contidas no presente convenio rexeranse polo establecido nas súas cláusulas.

OITAVA.- COMPATIBILIDADE

Esta axuda é compatible coa obtención doutras subvencións, axudas, ingresos ou recursos doutras entidades para a mesma finalidade procedentes de calquera Administración ou entes públicos ou privados, nacionais, da Unión Europea ou de organismos internacionais, sempre que a contía total das axudas non supere o 100% do importe da actividade subvencionada. No caso de que a subvención concedida supere, illadamente ou en concorrencia con outras, o custo da actividade para a que foi concedida a subvención, descontarase o exceso obtido sobre o citado custo.

NOVENA.- REVOGACIÓN, REINTEGRO E RESOLUCIÓN

A axuda concedida ao amparo deste convenio poderá ser obxecto de revogación ou reintegro, xunto cos xuros de demora, cando concorran as circunstancias previstas nos artigos 32 e 33 da Lei 9/2007, do 13 de xuño, de subvencións de Galicia, nos artigos 74 e seguintes do Decreto 11/2009, do 8 de xaneiro, polo que se aproba o Regulamento da lei de subvencións de Galicia e na Lei 38/2003, do 17 novembro, xeral de subvencións.

Será causa de reintegro total o incumprimento das obrigas establecidas na cláusula terceira deste convenio.



En todo caso, será causa de extinción deste convenio a inviabilidade da realización da actuación por causas non imputables ás partes. Así mesmo, será causa de extinción a denuncia por causas de interese público a instancia de calquera das partes asinantes.

DÉCIMA.- PUBLICIDADE.

De conformidade co artigo 17 da Lei 1/2016, do 18 de xaneiro, de transparencia e bo goberno, a Axencia Galega de Infraestruturas publicará no Diario Oficial de Galicia e na páxina web oficial o importe da axuda concedida. A sinatura do convenio leva implícito o consentimento expreso do beneficiario a favor da Administración concedente para o tratamento necesario dos datos relevantes da axuda concedida e a súa publicación.

Así mesmo, en cumprimento do disposto no artigo 20 da Lei 38/2003, do 17 de novembro, xeral de subvencións, a información requirida será comunicada á Base de Datos Nacional de Subvencións (BDNS).

UNDÉCIMA.- VIXENCIA DO CONVENIO.

Este convenio terá vixencia dende a súa sinatura ata o 31 de decembro de 2021 e financiará os gastos realizados dende o 1 de xaneiro de 2020 nas condicións establecidas na cláusula quinta.

Así o outorgan no lugar e data do encabezamento, subscribindo o presente convenio por triplicado exemplar.

A Presidenta da Axencia Galega de
Infraestruturas

Ethel Ma Vázquez Mourelle

Alcalde Concello
de Padrón

Antonio Fernández Angueira